

欽定八旗通志卷一百九十七

人物志七十七

大臣傳六十三

漢軍正白旗二 董衛國 石琳
王國安 華善 蔡毓榮

董衛國

董衛國漢軍正白旗人初任佐領歷官

國史院學士順治十八年擢江西巡撫康熙四年加

工部尚書銜九年以病乞休

詔慰留之十三年正月改兵部尚書銜時逆藩吳三桂犯

湖南長沙失守衛國疏請發兵備禦袁州吉安

命副都統根特巴圖魯自兗州移師赴援會逆藩耿精忠
復犯寧都廣昌南豐等處廣信副將柯昇叛應之
衛國密疏告急

命定南將軍希爾根會同衛國相機勦禦衛國復疏言州
逼賊氛應設總兵統兵三千鎮守並請以副將趙
應奎陞授

詔從之南瑞總兵楊富謀不軌衛國廉得實擒置之法並

殲其黨

上嘉其功七月設江西總督卽授衛國舊制南昌水師營兵五百以守備領之衛國奏省衛重地應改設遊擊增兵五百又江西營制馬一步九用兵之際多一馬兵可當步兵十奏改馬二步八均如所請行十一月耿逆賊黨分犯新昌上高衛國調遊擊佟國棟叅將趙登舉守備張射光往援大捷斬僞都督左宗榜十四年七月與希爾根等招撫泰和龍

泉永新廬陵僞官二百七十餘賊衆六萬五千有
奇上新昌金溪餘干諸寇遏廣信糧道十二月
衛國奏督兵親勦值簡親王喇布駐師南昌以省
城投誠人雜處堪虞督臣不宜他出奏止之十五
年正月遣中軍吳友名擊賊于瑞州復上新昌
二縣二月賊圍靖安調吳友名擊之賊潰十二月
遣副將許盛遊擊楊以松等先後敗賊于泰和定
南復其城十六年三月疏言賊首楊玉泰竊據宜

黃樂安崇仁山谷中請統官兵掃蕩

允之未幾招降崇仁僞總兵蔡仕伯宜黃僞總兵沈鳳祥
等五月大破賊衆于大嶺陣斬僞官百餘兵五千
餘復樂安玉泰窮蹙降時湖南平江及銅鼓營賊
起衛國留提督趙賴守樂安調本省兵援楚會簡
親王檄衛國標下兵盡赴樂安衛國以江西爲楚
粵控要省城駐滿兵不過二百恐守禦失利上疏
乞

賜罷斥

嚴旨責王不合並申諭嗣後調遣與衛國會商行之八月
遣兵徇建昌招撫僞總兵張發降其官一千餘衆
六萬餘九月擊走賊首朱統錮于瀘溪擒其黨金
洪尹文郁十二月遣兵徇新昌招撫僞總兵袁菊
茂等官一千三百餘衆五萬餘復銅鼓營衛國以
伏莽未靖疏請赴吉安隨簡親王協力撲剿留副
都統多諾守南昌得

旨緣營官兵聽便宜調遣十七年三月賊首韓大任赴閩
降其黨郭應輔等分據萬安泰和諸縣衛國勦其
衆四萬餘招撫僞總兵以下官三百餘衆四萬六
千餘分別安置六月吳逆犯永興薄吉安

上命衛國酌撥緣旗兵守吉安速募精銳五千備援先是
衛國奉

旨守銅鼓營三桂旣死餘黨據岳州長沙大兵圍之不下
十二月衛國奏銅鼓營寧謐無事請赴楚援勦

上嘉許並

授方畧未至岳州長沙繼定十八年正月

詔赴大將軍安親王岳洛軍協同進取于是衛國隨大軍由
衡州寶慶大敗賊于紫陽河雙井舖復武岡城嗣
給事中李宗孔劾衛國居總督任不治事失民心
廷議革職

諭戴罪圖功十九年三月率兵破鴨婆黃茅等嶺進勦靖
州賊與都統穆占會追敗偽將軍吳應麟等復沅

州十月至鎮遠奪石巷口抵大巖門僞將軍張足
法悉衆拒衛國親奮擊大破之足法夜遁追至油
聞關而還復鎮遠城大兵既定貴州大將軍貝子
彰泰進征雲南留衛國守貴陽二十年雲南平回
任二十一年調湖廣總督二十二年廷議前綏遠
將軍湖廣總督蔡毓榮劾衛國不聽調度貽誤軍
機而衛國有平鎮遠功請免議

諭曰董衛國遵朕指授剿定賊寇恢復鎮遠實爲可嘉蔡

毓榮勞績遠出其下且二人敵體大臣無聽調度例以
妬功故陷人重罰著將蔡毓榮降五級調用先是御史
蔣伊劾衛國縱兵俘掠至是江西總督于成龍疏
辯十一月衛國入

觀瀕行

諭曰爾在外二十餘年地方事宜知之已悉前此用兵之
際未免騷擾閭閻今天下承平當思休養民力至于興
革利弊尤在嚴飭所屬實力奉行爾前有勞績朕罔不

知毋畏人言勉圖後效十二月衛國遭疾卒於任

賜祭葬如例

石琳 兄子文展

石琳漢軍正白旗人都統石廷柱第四子順治十四年由佐領兼禮部郎中康熙元年授山東按察使二年正月丁母憂十一月起補江南按察使三年六月以前在山東承追入官房地變價遲延降一級調用六年十二月授浙江鹽運使十二年五

月遷湖廣下荆南道十三年襄陽總兵楊來嘉副
將洪福叛應逆藩吳三桂踞房縣保康竹山煽誘
醜徒嘯聚南漳縣之天門蘭山鷄公等寨時出劫
掠石琳同總兵劉成龍搜剿斬獲甚衆撫定各寨
洞總督蔡毓榮疏報捷功得

首嘉獎十五年九月遷江南按察使二十年五月遷浙江
布政使二十三年九月擢湖廣巡撫二十四年工
部以建造

太和殿檄催各省採運楠木杉木琳以楠木產自萬山之中挽運維艱疏請展限部議不准

丁曰各省所運楠木杉木山路崎嶇挽運艱難若限期太迫恐致擾民其令從容運送勿累民力二十五年十一月調雲南巡撫二十六年十二月疏言省城外松華壩并金汁等六河壩閘上引松華諸山之水源下以資昆明諸縣之灌溉額設歲修銀八百兩貯庫以待不時之需自康熙二十二年修築後迄今

四載屢被山水衝決致田禾淹沒今急需修築勘
估銀三千一百六十兩請動支貯庫歲修銀俟工
竣報銷事下部議行二十八年五月疏言臣奉

旨詳察賦役全書應行更改增刪者謹採訪輿情臚列八
條一滇省自明初置鎮設衛以田養軍名曰屯田
又有給指揮等官爲俸聽其招佃者名曰官田其
每畝租入較民賦十數倍猶之佃民納租於田主
我

朝開滇之始吳三桂留鎮就昔日之租數充正供之糧額相沿至今積逋逾多官民交困當改照民賦上則例起科者也一滇省鹽井有九竈戶從井汲滴用柴薪煎煮工費甚繁以各井行鹽之多寡爲每歲徵課之重輕阿陋等六井井小課少辦納猶易若瑯井每觔征課六釐白井每觔征課八釐至黑井每觔征課一分六釐此明末亂時額外橫加較明初原額每觔二釐有奇不啻數倍今卽難議

盡減如原額當減黑白二井照琅井每觔六釐者也一開化府自康熙四年吳三桂勦平土酋後勘丈額田七百五十九頃有奇每畝科米一斗六升三合較之在昔未設府以前每畝不過二三升相去懸殊且通省民糧最重者惟河陽縣上則田每畝征米八升一合有奇今當酌量減半與河陽縣一例者也一元江府由土改流吳三桂因官兵駐防糧運不繼遂於額糧之外別立名色曰田錢地

講銀曰茶商稅銀曰普洱無耗秋米曰浪媽等六寨地租以元江之崎嶇山谷加此數倍之糧實難辦納所當各減其半者也一通海縣六寨地糧較民賦重幾三倍當改照新定民賦科則磬嘉縣每糧一石徵條編銀四兩有奇較通省亦爲偏重今旣歸南安州附徵卽應與州一例每糧一石徵條編銀一兩四分者也一麗江界連土番古稱荒服吳三桂叛後割金沙江以內喇普地與蒙番地去